

Dobar Vam dan Prijatelji!

Dobar Vam dan i dobro došli!

Hvala Vam što ste izabrali da ovaj dan podijelite s nama.

Dan Velikih. Dan Svetih. Dan Zvonik.

Zvonik kao Porta. Porta kao simbolika. Vrata kroz koja prošavši iz svijeta materijalnog ulazite u drugi svijet. Svijet duha, svijet neba. Hiljadu melodija ovih četrnaest zvona, kao hiljadu strijela ljubavi pogađaju sva srca koja ih čuju. I ona meka i topla, i ona druga, samo naizgled tvrda. I ako samo jedna jedina duša tvrdoga srca zatreperi na zvuk ovih zvona, strunama Božje ljubavi, ona su opravdala svoje postojanje. Jer ništa ne postoji samo za sebe. Pa ni naša srca. A svako je srce Božje. I svako mora pred Njega. Prije ili kasnije.

Možda je zvuk zvona sa ovog Zvonika znak, poziv. Poziv na pomirenje. Poziv na ujedinjenje. Poziv na zajedničko u nama. A to je Nada. A Nada je samo jedno od imena vjere. Jer je uvijek s nama. Jer nas nikada ne napušta. Nada u bolje, u ljepše, u sutra, u sada.

U želju, da Duh Ostroga, Duh Svetog Vasilija Ostroškog, Slava mu i Milost, dotakne ovaj Zvonik i pretvori ga u Svoj Zvonik. I da, kao njegovo Svetilište pod Ostroškim gredama, ne bude samo mjesto okupljanja ljudi svih rasa, nacija, vjeroispovijesti, već i okupljanja ljudskih srca koja traže Nadu. Boga. Jer Nada je i samo jedno od imena Boga. Nada u Slobodu. Nada u Slogu. Nada u Dobrotu Ukrajine, Evrope.

Ukrajine, gdje hiljadama godina živi najtoplija slovenska duša. Duša, u kojoj se od skora kupaju i simboli naše duhovnosti. Esencija Crne Gore simbolično prisutna ovdje u Ukrajini, na ovom malom, ali za nas svetom prostoru. Da Velikog Njogoša bude zlatni zvuci zvona Svetog Vasilija. A danas, na dan otvaranja, da mu čestitaju rođendan. Da poput nebeske soe, Durmitora, koja pridržava crnogorsko nebo, ova soa dva crnogorska velikana, pridržava nebo iznad Kieva.

Putovanje s Bogom je ljepše od samo putovanja. I ako budete prolazili ovuda a ne budete čuli ova zvona, uplašite se. Jer ona su poput ptica koje ne čujete, prolazeći ispod njihovog cvrkuta u krošnjama drveća, jer ste negdje drugdje, jer niste tu gdje bi trebali biti. U sada. U ovdje. Jer samo je ono naše. To tako prosto, jednostavno, a sveto, SADA I OVDJE. Sveto koliko može biti sveto svo ljudsko znanje. Sva istorija, filozofija, religija. Sve što je čovjek dosad napravio i spoznao. Sva i jedina beskonačnost, do Boga. U zvuku tvojih zvona. U cvrkutu tvojih ptica. U Bogu Sada, i Bogu Ovdje.

Da nas ova zvona probude. Da znamo da imamo mogućnost izbora. A izbor je ona čestica Boga u svakom od nas. Da nju dotakne i probudi ljubav Svetog Vasilija Ostroškog kroz zvuke ovih zvona koje će te ponijeti sa sobom kao dar ovoga dana, da Vas svaki zvuk zvona gdje god bili i kad god ga čuli, povede kroz vrijeme i prostor do ovog mjesta, do ovog dana, do ovog Zvonika i ljubavi Svetog Vasilija Ostroškog, Slava mu i Milost!

Hvala Stanislavu Dvorgiju za ideju i inicijativu nastanka ovog Zvonika, a posebno mu hvala što je omogućio da budem jedan od zadužbinara ovog poklona Bogu i ljudima. Ponosan sam što sam u ovoj svetoj misiji bio sa mojim prijateljima i posebnim ljudima Igorom Voronovim i Mihailom Zgurovskim. Hvala ti Igore. Hvala ti Mihail. I još jednom ti hvala za ovaj današnji dan Stanislave.

U moje ime i u ime tvoje i moje Crne Gore a na čast Ukrajine.

Živjela Ukrajina!

Nek je vječna Crna Gora!

Kijev, 13.11. 2014. g.